

IMENOVANJA Još jedan gaf Predsjedništva BiH

Za ambasadora u Sloveniju šalju kompromitiranog Željka Jerkića

Riječ je o bivšem ambasadoru BiH u Holandiji, koji je svojevremeno odstupio sa te pozicije kako bi prešao na drugi posao, ali je nastavio primati plaću iz budžeta

Predsjedništvo BiH imenovalo je Željka Jerkića, nekadašnjeg ambasadora BiH u Holandiji, za ambasadora naše u zemlji u Sloveniji, saznaje „Dnevni avaz“. Jerkić, kojeg je ovo imenovanje zateklo na poziciji savjetnika u Ministarstvu vanjskih poslova (MVP) BiH, u Ljubljani odlazi nakon što je krajem prošle godine preminuo dotadašnji ambasador BiH u Sloveniji Slavko Puljić.

Dupla plaća

Izvori upućeni u Jerkićeva ranija diplomatska iskustva s iznenađenjem su dočekali vijest o njegovom najnovijem unapređenju, s obzirom na to da je upravo ovaj diplomata svojevremeno izazvao pravi međunarodni skandal.

Jerkić je, naime, 2005. godine, dok je bio u misiji u Hagu, ambadorsku poziciju odlučio zamijeniti jednom

od direktorskih u Organizaciji za zabranu hemijskog naoružanja (OPCW) sa sjedištem, također, u Hagu.

Na tu poziciju Jerkić je aplicirao sam, odnosno na službovanje ga nije uputila nijedna institucija naše zemlje, nego je konkurirao na to mjesto zbog više plaće, a tek kada je primljen, obavijestio je Predsjedništvo BiH i MVP da odstupi s ambadorske pozicije, što su oni i aminovali.

No, nije se odrekao plaće u MVP-u, pa je narednih pet godina bio zaposlenik i MVP-a i OPCW-a.

Ovu aferu svojevremeno je otkrio „Transparency International BiH“ (TIBiH),



Jerkić: Za skandal nagrađen novom pozicijom



KORAJLIĆ: Aferu otkrio „Transparency International BiH“

koji je o duplim Jerkićevim primanjima izvijestio i bh. institucije i OPCW. Kako je u izjavi za „Avaz“ podsjetila Ivana Korajlić iz TIBiH, u Vijeću ministara tada im je rečeno da su Jerkićeva primanja regulirana odlukom o participaciji u troškovima državnih službenika i funkcionera BiH u međunarodnim organizacijama.

Raskinuo ugovor

- Ta odluka do danas je ostala sporna, jer smo je dobili bez pečata, potpisa, datuma donošenja i ikakvog dokaza da je ona objavljena u „Službenom listu“. Mi smo čak podnosili i tužbu Sudu BiH u vezi s ovim slučajem, ali smo odbijeni - kazala je Korajlić.

Dalje ističe da se TIBiH obraćao zbog Jerkića i OPCW-u.

- U međuvremenu su nam odgovorili da Jerkić nije više kod njih angažiran te da ne komentiraju status bivših uposlenika. Došli smo do informacija da je Jerkiću savjetovano da sam raskine ugovor, i to dvije godine prije isteka, jer u prijavi koju smo dobili za Jerkića bilo je navedeno da ta organizacija nije znala za njegova primanja iz BiH, čime je prekršio ugovor - kaže Korajlić.

Uprkos ovom skandalu, Jerkić je vraćen na posao ministra savjetnika u MVP-BiH u Sarajevu.

- Najblaže rečeno, čudno je da se osoba koja se dovela u vezu sa spornim primanjima ponovo upućuje u diplomatsku misiju. Očigledno je da oni koji vrše ovakva imenovanja imaju kratku memoriju - kaže Korajlić. **S. DEGIRMENDŽIĆ**

Oštetio budžet BiH za 400.000 KM

Pretpostavlja se da je Jerkić u OPCW-u imao plaću od oko 110.000 dolara godišnje, a istovremeno mu je godišnje iz budžeta institucija BiH isplaćivan iznos od oko 80.000 KM,

što znači da je iz BiH imao mjesečna primanja viša od 6.500 KM. Prema ovoj računici, Jerkić je za pet godina iz državnog budžeta naplatio oko 400.000 KM, a nije radio!

Nastradao još jedan bh. državljanin

Ferid Tatarević poginuo u Siriji

Državljanin BiH Ferid Tatarević poginuo je na ratištu u Siriji, prenijeli su jučer brojni bh. portali.

Riječ je o nekadašnjem pripadniku odreda „El-Mudžahid“, koji je rodom iz Zenice.

Kako se procjenjuje, do sada je na ratištu u Siriji poginulo na desetine vehabija iz BiH koji su se borili na strani opozicije protiv režima sirijskog predsjednika Bašara el-Asada.

U Siriju su, navodno, stigli preko turskog grada Antakije, gdje se godinama okupljaju dobrovoljci iz cijelog svijeta.

Dom naroda Parlame-



Tatarević: Bivši pripadnik odreda „El-Mudžahid“



Uznemirujuća fotografija mrtvog Tatarevića

nta BiH usvojio je prije nekoliko dana Prijedlog zakona o dopuni Krivičnog zakona BiH, čiji je predlagatelj Klub poslanika Saveza za bolju budućnost BiH, a

inicijator Fahrudin Radončić, državni ministar sigurnosti i predsjednik SBB-a.

Dopuna ovog zakona omogućava zabranu odlaska

bh. građana na strana ratišta te sankcioniranje organizatora koji vrbuju građane BiH za ratovanja u stranim zemljama.

M. Aš.

Komentar dana

Piše: **Almasa HADŽIĆ**
(almasahadzic@avaz.ba)



Pravda za Behku!

Šta ćemo sa drugim lopovima što, umjesto kanabisa, već 15 i više godina „zalijevaju“ kriminal u fabrikama, bankama, telekomima...

Sedamdesetogodišnja Behka Kukavica iz Međeđe kod Višegrada prije nekoliko dana fasovala je dvije godine zatvora - uvjetno tri godine, jer je kao članica „organizirane kriminalne grupe“ u povratničkoj Međeđi „u neznanju“ zalijevala nezakonito uzgajane stabljike kanabisa!

U intenzivnom traganju za počiniocima krivičnih djela u BiH, organ gonjenja tako su, odlučni da se suprotstave „svim oblicima kriminala i njihovim izvršiocima“, za vrat uhvatili i nanu Behku i zaprijetili joj zatvorom u Tuzli, ako se slučajno više ikad uhvati šlaufa i vode u bilo kojoj svojoj njeni u Međeđi! Tugo moja pravosudna!!!

Nebitno je li ili nije Behka Kukavica znala da je uzgoj kanabisa protuzakonita radnja, ali je bitno, da bitnije ne može biti, da pored tolikih baraba, pljačkaša državne imovine, kriminalaca u ovoj zemlji, policija i pravosuđe svoj radni učinak pravdaju hvatanjem i osuda-

ma nane Behke.

Naravno da je uzgajanje kanabisa, kao i druge pobrojane radnje, krivično djelo i treba ga sankcionirati.

Ali, šta ćemo sa sarajevskim, tuzlanskim i drugim lopovima što, umjesto kanabisa, već 15 i više godina „zalijevaju“ kriminal u domaćim fabrikama, bankama, telekomima, elektrana, što su se bogatili namještanjem tendera, krali sve do čega su došli - od asfalta do lijekova - i danas mirno, bez straha od policije i sudova uživaju u svom nelegalno stečenom imetku.

Kako to da je pravda dobacila čak do Međeđe i uhvatila Behku u nelegalnim radnjama, a godinama ne uspijeva saznati kako su, naprimjer, novopečene gazde „Dite“ „Poliolhema“... zavještale trećinu Tuzle za kredite čije su milione odnijeli u inozemstvo.

Što prije policija i pravosuđe shvate zašto je presuda Behki Kukavici hit informacija u BiH i regionu, to bolje i za njih i za nas, naravno.

www.avaz.ba



PORTAL - komentar dana

Ešdaun: Rusija od BiH pravi novu Ukrajinu
- Ešdaun je za vrijeme svoje misije u BiH bio brutalno napadan od SDP-a, SNSD-a i SDA jer je radio za dobro ove države. Sve ove postratne godine su nas naučile, protiv koga su ove tri stranke, taj je za uspješnu BiH. **(Selver Hibić)**

597.411


posjeta na portalu „Dnevnog avaza“ jučer je zabilježio „Google Analytics“.

'Adidas' je marka koja i pristaje Zmajevima

Pitanje: Mislite li da je Nogometni savez BiH napravio dobar potez uspostavljanjem saradnje s „Adidasom“, koji će naredne četiri godine opremiti našu reprezentaciju?

- A) Da
- B) Ne
- C) Ne znam

80%
11%
9%



O aktuelnim pitanjima u BiH i svijetu možete glasati svakog dana na www.avaz.ba.

NAJPOSJEĆENIJI PORTAL U BIH